

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATO' SERI ONG KA CHUAN
(TANJONG MALIM)**

PERTANYAAN : LISAN

TARIKH : 12.03.2015

Y.B. DATO' SERI ONG KA CHUAN [TANJONG MALIM] minta **MENTERI KEWANGAN** menyatakan apakah langkah-langkah yang telah dan akan diambil oleh Kerajaan untuk memastikan nilai mata wang Malaysia sentiasa dikawal dan dikekalkan pada kadar yang lebih stabil.

JAWAPAN

Tuan Yang di-Pertua,

Untuk makluman Ahli-ahli Yang Berhormat, penyusutan kadar

pertukaran nilai ringgit yang berlaku baru-baru ini bukanlah suatu kes terpencil dan ianya didorong terutamanya oleh faktor luaran. Mata wang serantau yang lain turut mengalami penyusutan nilai antara 1.1% sehingga 10.1% berbanding dolar AS sejak bulan September 2014 hingga 5 Mac 2015. Pengukuhan dolar AS adalah disebabkan oleh prospek ekonomi AS yang semakin baik dan kemungkinan kenaikan kadar faedah di AS yang menarik minat pelabur terhadap aset dalam nilai dolar AS. Selain itu, negara-negara pengeksport komoditi, termasuk Malaysia, turut mengalami kesan ekoran kejatuhan harga minyak mentah dunia.

Tuan Yang di-Pertua,

2. Seperti sistem kadar pertukaran yang lain, apabila nilai ringgit menyusut, sebahagian sektor ekonomi akan menerima manfaat manakala terdapat juga sebahagian sektor ekonomi yang akan terjejas. Pengeksport akan menerima manfaat dari segi hasil eksport yang lebih tinggi dalam nilai ringgit atau peningkatan dalam permintaan bagi barangan buatan Malaysia. Secara khususnya, penyusutan nilai ringgit akan memberi manfaat kepada eksport perkilangan Malaysia yang menyumbang

sebanyak dua pertiga daripada jumlah eksport kasar.

3. Namun begitu, penyusutan nilai ringgit akan menyebabkan kenaikan kos import. Ini akan menyebabkan kesan langsung terhadap Indeks Harga Pengguna (IHP) yang mengukur inflasi kerana harga barangan yang diimport secara terus dari luar negara akan menjadi lebih mahal. Walau bagaimanapun, kesan terhadap kadar inflasi adalah kecil, memandangkan barangan import tidak termasuk petrol dan diesel mencakupi 7% daripada bakul IHP. Penyusutan nilai ringgit juga akan menyebabkan peningkatan kos pengeluaran berikutan kenaikan harga bahan mentah yang diimport. Walau bagaimanapun, kesan ini akan diserap oleh harga bahan mentah yang lebih rendah susulan kejatuhan harga minyak global dan harga komoditi. Harga minyak mentah global telah turun sebanyak 41% sementara harga makanan dunia telah turun sebanyak 8% sejak September 2014. Oleh yang demikian, kesan terhadap kos bagi pengeluar adalah terkawal. Ini ditunjukkan oleh Indeks Harga Pengeluar, dengan izin *Producer Price Index*, telah menurun sebanyak 3.5% antara bulan September 2014 dan bulan Januari 2015.

4. Untuk makluman Ahli-ahli Yang Berhormat juga, kejatuhan harga minyak mentah global pada tahun 2014 tidak memberi kesan ketara kepada jumlah pendapatan sebenar Kerajaan Persekutuan berbanding anggaran asal. Secara keseluruhan, purata harga minyak mentah dunia masih tinggi, iaitu kira-kira dolar AS 99 setong bagi jenis Brent berbanding anggaran asal sebanyak dolar AS 105 setong. Bagi tahun 2014, Kerajaan Persekutuan memperoleh sebanyak RM66.1 bilion daripada sumber berasaskan petroleum, iaitu 30% daripada hasil keseluruhan Kerajaan Persekutuan.

Tuan Yang di-Pertua,

5. Berhubung dengan persoalan berkenaan rejim tambatan ringgit, walaupun ringgit telah menyusut nilai, Kerajaan tidak bercadang untuk kembali melaksanakan dasar yang sama seperti krisis kewangan Asia pada tahun 1997/1998, memandangkan keadaan Malaysia pada ketika itu adalah amat berbeza jika dibanding dengan sekarang. Keadaan semasa adalah didorong oleh perkembangan global sepertimana yang juga dialami oleh negara-negara serantau. Yang penting, aktiviti ekonomi dan

kewangan negara masih tidak terjejas. Keadaan ini amat jauh berbeza berbanding apa yang dialami pada lewat 1990an. Langkah-langkah yang ekstrim seperti tambatan nilai ringgit hanya untuk situasi yang ekstrim. Yang pasti, kita tidak berada di dalam situasi sebegitu.

6. Ekonomi negara masih berada pada tahap yang kukuh dengan mencatat pertumbuhan yang mapan sebanyak 6% pada tahun 2014 berbanding 4.7% pada tahun 2013. Pertumbuhan ekonomi yang baik ini adalah hasil daripada pelbagai inisiatif yang diambil untuk mempelbagaikan ekonomi negara serta meningkatkan daya tahan dan daya saing negara. Pertumbuhan ekonomi ini dipacu oleh permintaan domestik dan asas-asas ekonomi kekal kukuh seperti kadar pengangguran yang rendah, sistem kewangan yang teguh dan rizab antarabangsa yang tinggi.

7. Seperti mana-mana sistem kadar pertukaran yang fleksibel, turun naik jangka masa pendek adalah sesuatu yang mungkin berlaku, terutamanya dalam persekitaran global yang tidak menentu. Objektif dasar Kerajaan menerusi Bank Negara Malaysia adalah untuk memastikan

148

keadaan yang teratur dalam pasaran pertukaran asing ringgit dan mengelakkan turun naik yang ketara dalam kadar pertukaran. Ini adalah penting memandangkan Malaysia merupakan sebuah ekonomi yang sangat terbuka dengan aktiviti perdagangan dan pelaburan antarabangsa yang tinggi. Dalam jangka masa panjang, trend ringgit akan mencerminkan asas-asas ekonomi Malaysia. Usaha-usaha yang dilaksanakan untuk membangunkan dan memperdalamkan pasaran pertukaran asing dalam negeri dari segi saiz dan instrumen juga telah membolehkan peniaga tempatan untuk berlindung daripada terdedah kepada ketidakstabilan kadar pertukaran melalui perlindungan nilai.